



Rabu, 18 Agustus 2021

Ogen: Filipi 4:13



Ngalaben Kerina Keadaan



Lit sada lagu Karo ija kata-katana eme "ndigan..ndigan..ndigan..ndigan...ndigan...ndigan..ndigan..jorena".

Lagu riang enda tempa-tempa sada keluhen kerna kegeluhen si dem alu perbeben ras kesusahen. Apai kin jelma manusia la kena kesusahen? Kerina nge kita susah si akap terlebih bas situasi pandemic enda.

Lit sura-sura turah sinanggal, sinik pe kita reh ka me perbeben. Subuk perbeben bas pusuh, kerna kelemahen kulanta bagepe perbeben si reh arah paktor luar nari. Kerina e jadi salah sada erkiteken upah dosa. Sabap la banci lang ndarat panas ras iluhta i bas ndalani kegeluhen i doni. Tole nari si nuhsahi geluhta eme pendahin iblis si ndaram-ndarami dalam rusur gelah kita nilah i bas Dibata. Emaka ola ateta mamang, kesusahen jadi ayam-ayam geluhta. Sabap Iblis pe tetap erdahin seh rehna Antikris guna mabai kalak si la erkemalangen man Tuhan ku bas kematen si rasa lalap.

Geluh enda memang ingan latihan, tapi ola gelap mata kinitekenta ngidah maka Tuhan e ndatasi kerina persoalen geluh. Nina kin Rasul Paulus, kerina kesusahen nggo pernah inanamina. Lumben erkiteken laman ras sibuk erdahin, menam gedap bas kapal nari, itokohi kalak, ifitnah kalak perban masa laluna, bagepe erkiteken ia meritaken Berita Si Meriah, ntah kai deba nina kalak. Ipenjaraken, isiksa, terancam kematen. Adi kalak si lemah kinitekenna pasti i bas keadan si bage, putus asa, ndele ras lanai nggit nembah Tuhan. Tapi erkiteken Tuhan ras Paulus banci isimpulkenna geluhta tetap ermalem ate sabap man bana nggeluh amin gia mesera guna Tuhan ras mate sada keuntungan sabap enggo jumpa ras Kristus ndai. Emaka la aru atena kerna kai pe sabap tek ia Bapa si isembahna eme Tuhan si ndatasi kerina persoalan. La lit pintu si la ngsup Tuhan mbukasa. La lit si mustahil i bas IA. Emaka kai pe perbebenta ola minter aru ateta. Lit Tuhanta, Jesus Kristus si gagah perkasa.

